

# Leabhar na nOLAGÓN

## Pianpháis na Cathrach Tréigthe

1 Ochón!

An chathair a bhíodh plúchta le daoine,  
maireann sí léi féin ar an uaigneas;  
is cosúil le baintreach anois  
í siúd ar mhór ab fhiú í i measc na náisiún;  
banphrionsa i measc na gcúigí ab ea í  
ach is daorstát í faoi láthair.

<sup>2</sup> Bíonn sí ag gol go géar goirt san oíche;  
bíonn a gruanna báite le caisí deor;  
níl aon sólásaí ar bith aici  
i measc a cuid leannán;  
d'fheall a cairde go léir uirthi;  
is naimhde di iad anois.



<sup>3</sup> D'imigh Iúdá léi ar deoraíocht  
chun angar agus daoirse a sheachaint;  
cónaíonn sí i measc na náisiún  
ach ní bhfaigheann sí ionad suaimhnis ann;  
óir, tá an tóir tar éis teacht suas léi  
mar a bhfuil sí i gcúngrach mór.

<sup>4</sup> Tá bóithre Shíón ag caoi  
mar ní thaithítear a hionad teagmhála;  
tá a geataí uile bánaithe  
agus déanann a sagairt osnaíl;  
bíonn a maighdeana go léir á gcrá.  
Ó nach goirt é an seirfean atá uirthi!

<sup>5</sup> Ag a naimhde atá an ceannas;  
tá a heascairde uile faoi rath;  
óir tá an Tiarna tar éis í a chiapadh  
de dheasca oll-líon a peacaí;  
tá a leanaí imithe ina gcimí  
os comhair a namhad amach.

<sup>6</sup> Tá a mórgacht uile leáite  
ó iníon Shíón;



ba chosúil a flatha le fianna  
 nach raibh féarach acu níos mó;  
 bhíodh siad ar a dteitheadh go lagbhríoch  
 roimh an tóir a cuireadh orthu.

<sup>7</sup> Is cuimhin le Iarúsailéim anois  
 a laethanta angair agus fáin,  
 nuair a thit a muintir lena naimhde  
 agus gan cabhróir dá laghad acu.  
 Bhíodh a heascairde ag baint lán na súl aisti;  
 ábhar scige dóibh ab ea a turnamh.

<sup>8</sup> Pheacaigh Iarúsailéim go trom;  
 dá dheasca sin is neamhghlan í anois;  
 an dream a thugadh gradam di, maslaíonn siad í;  
 óir, chonaic siad lomnocht í;  
 ach bíonn sise ag caoineadh de shíor  
 agus tugann sí a cúl leo.

<sup>9</sup> Tá a salachar féin ar a sciortaí;  
 níor mhachnaigh sí riamh ar a raibh i ndán dí;  
 ó nach tubaisteach é a turnamh!  
 Níl sólásaí ar bith aici.



“Féach, a Thiarna, ar m’ainnise;  
is ag mo naimhde atá an bua.”

<sup>10</sup> Shín a heascairde a lámha amach  
chun a maoinese go léir;  
chonaic sise na náisiúin  
ag réabadh isteach ina sanctóir –  
an dream ar chros tú féin orthu  
do chomhthionól a thaithí.

<sup>11</sup> Bíonn a muintir uile ag éamh  
agus arán á lorg acu;  
malartaíonn siad a n-iarmhais ar bhia  
chun iad féin a neartú arís.  
“Féach, a Thiarna, agus breathnaigh  
ar an drochmheas a chaitear orm.

<sup>12</sup> Sibhse uile a thriallann thar bráid,  
breathnaígí agus féachaigí  
an bhfuil aon bhrón mar mo bhrónsa –  
mar an gcumha atá ag criathairt mo chroí,  
a chuir an Tiarna féin orm,  
ar lá a dhíbheirge fíochmhaire.



<sup>13</sup> Ón aird thuas chuir sé tine isteach i mo chnámha  
a rug greim daingean orthu go léir;  
leath sé líon do mo chosa  
agus thug orm casadh ar ais;  
d'fhág sé go tréigthe mé  
agus mé go dona tinn ó lá go lá.

<sup>14</sup> Tá mo chionta ceangailte ina gcuing;  
fíodh le chéile iad ina lámhasan  
agus ardaíodh iad ar mo mhuineál;  
eisean ba chúis le lagú mo nirt;  
thug an Tiarna ar láimh dóibh mé  
sa chaoi nach dtig liom fanacht i mo sheasamh.

<sup>15</sup> Na gaiscígh uile a bhíodh agam,  
tá an Tiarna tar éis iad a shéanadh;  
thug sé slua le chéile i m'aghaidh  
chun mo chuid ógánach a chloí;  
tá an Tiarna tar éis satailt sa chantaoir  
ar iníon fhíorógh Iúdá.

<sup>16</sup> Sin an fáth a mbím ag caoi  
agus ag sileadh na súl go fuíoch



Óir, is fada uaim aon sólásaí  
 a mhúsclódh mo mheanma arís.  
 Tá mo chlann mhac treascartha tréigthe  
 mar is é an namhaid a rug an bua.

<sup>17</sup> Leathann Síón a lámha amach;  
 níl sólásaí ar bith aici;  
 thug an Tiarna ordú in aghaidh Iacóib  
 a chomharsana a bheith naimhdeach dó;  
 rud éigin neamhghlan ina measc  
 is ea Iarúsailéim.

<sup>18</sup> Is cothrom cóir é an Tiarna;  
 ach bhí mise easumhal dá ordú;  
 éistigí, mar sin, a chiníocha uile,  
 agus breathnaígí ar m'ainnise;  
 tá mo mhaighdeana agus m'ógánaigh  
 imithe uaim i mbraighdeanas.

<sup>19</sup> Ghlaoiigh mé ar mo chuid leannán;  
 ach chlis siad go léir orm;  
 mo shagairt agus mo sheanóirí uile,  
 díothaíodh iadsan sa chathair,



nuair a bhí siad ag cuardach bia  
chun iad féin a neartú arís.

<sup>20</sup> Féach, a Thiarna, is mise atá go hainnis;  
tá a bhfuil istigh ionam corraithe cráite;  
tá mo chroí á shníomh i m'ucht  
mar ba mhór ar fad m'easumhlaíocht;  
tá an claíomh ag dísciú mo chlainne lasmuigh  
agus tá an Bás i réim laistigh.

<sup>21</sup> [Éist] le mo chuid osnaíola;  
níl aon sólásaí ar bith agam;  
chuir scéala m'anó áthas ar mo naimhde uile;  
ar ndóigh ba thusa ba bhun leis go léir;  
luathaigh an lá atá fógartha agat,  
nuair a bheidh siadsan mar a bhfuilimse anois.

<sup>22</sup> An mhailís go léir a rinne siad,  
go gcuirtear ar do shúile duit í;  
caith leo mar a chaith tú liomsa  
de dheasca mo chionta uile;  
óir, is iomaí osna atá á ligean agam  
agus tá mo chroí go tréithlag fann.”



## Is é an Tiarna a Smachtaigh Thú; Déan Aithrí

2 Ochón!

Tá an Tiarna tar éis duibhe a chur  
ar iníon Shíon le corp cuthaigh;  
theilg sé ó neamh go talamh  
áilleacht Iosrael;  
níor chuimhin leis stóilín a chos  
ar lá a chuid díbheirge.

<sup>2</sup> Scrios an Tiarna go neamhthrócaireach  
áitribh uile Iacóib;  
chreach sé go fíochmhar feargach  
dúnta iníon Iúdá;  
leag sé ar lár agus thruailligh sé  
an ríocht agus a flatha.

<sup>3</sup> Bhasc sé le fraoch feirge  
cumhacht uile Iosrael;  
níor thug sé tacaíocht a dheaslámhe  
in aghaidh an namhad;



las sé suas in Iacób mar chraos tine  
a d'ídigh a raibh ina thimpeall.

<sup>4</sup>Theann sé a bhogha mar namhaid  
agus dhaingnigh sé a dheaslámh mar eascara;  
rinne sé ár orthu siúd  
ar lán a shúl iad tráth;  
lig sé a racht amach mar thine  
ar bhoth iníon Shíón.

<sup>5</sup>D'iompair an Tiarna é féin mar namhaid;  
rinne sé Iosrael a mhilleadh;  
scartáil sé a caisleáin go léir;  
leag sé a dúnta daingne;  
mhéadaigh sé an éagaoin agus an t-éagnach  
a bhí á ndéanamh ag iníon Iúdá.

<sup>6</sup>Scríos sé an gairdín agus a bhoth;  
chreach sé a ionad teagmhála;  
i Síón chuir an Tiarna ar ceal  
an tionól féiliúil agus an tsabóid;  
le racht cuthaigh thug sé droim láimhe  
don rí agus don sagart araon.



<sup>7</sup> Rinne an Tiarna a bheag dá altóir;  
 ghlac sé fuath dá shanctóir;  
 chuir sé ballaí a caisleán  
 i seilbh a naimhde nimhneacha;  
 tógadh gártha i dteach an Tiarna  
 mar a thógfaí ar fhéile reachtúil.

<sup>8</sup> Chinn an Tiarna ar chonamar a dhéanamh  
 de bhalla iníon Shíón;  
 shín sé an dorú tomhais leis  
 agus níor stad sé go raibh sé scriosta;  
 chuir sé drochbhail ar bhalla agus ar bhábhún  
 sa chaoi go bhfuil siad araon ag mionú.

<sup>9</sup> Tá a geataí sáite sa talamh;  
 mar réab sé agus bhris sé a mbarraí;  
 tá a rí agus a flatha i measc na náisiún  
 agus níl aon dlí ann níos mó;  
 go fiú ní bhfaigheann a cuid fáithe  
 aon fhís ar bith ón Tiarna.

<sup>10</sup> Tá seanóirí iníon Shíón  
 ina suí ar an talamh ina dtost,



luaithreach caite ar a gceann acu  
 agus iad gléasta in éadach róin;  
 tá a gceann cromtha go talamh  
 ag maighdeana Iarúsailéim.

<sup>11</sup> Tá mo shúile tnáite le caoineadh  
 agus a bhfuil istigh ionam corraithe cráite;  
 tá mo chroí á reabadh le brón  
 mar gheall ar léirscrios mo phobail ionúin;  
 óir tá naíonáin agus leanaí cíche  
 ag snoí i gcearnóga na cathrach.

<sup>12</sup> Bíonn siad ag fiafraí dá máithreacha  
 “Cá bhfuil an t-arán (agus an fíon)?”  
 agus iad ag titim mar dhaoine gonta  
 i gcearnóga an bhaile,  
 agus an t-anam ag sceitheadh astu  
 i mbaclainn a máithreacha.

<sup>13</sup> Cá bhfaighidh mé do leithéid nó do shamhail,  
 a iníon Iarúsailéim?  
 Cad leis a samhlóinn thú chun tú a shólású,  
 a iníon ógh Shíón?



Óir, tá do scrios chomh leathan leis an bhfarrage.  
Cé a fhéadfaidh thú a leigheas?

- <sup>14</sup> Chonaic do chuid fáithe thar do cheann  
físeanna folmha fealltacha;  
níor nocht siad duit d'urchóid,  
rúd a chuirfeadh cor bisigh i do chinniúint;  
ní bhfuair siad thar do cheann sna físeanna  
ach oracail bhréagacha mhealltacha.
- <sup>15</sup> Na daoine uile a ghluaiseann tharat,  
buaileann siad a mbosa i d'aghaidh;  
déanann siad faireach agus croitheann siad a gceann  
le hiníon Iarúsailéim:  
“An í seo an chathair ar glaodh uirthi:  
‘Blas na hÁille’, ‘Ábhar Áthais an Domhain Mhóir’?”
- <sup>16</sup> Osclaíonn do naimhde uile a gcaos  
chun tú a shlogadh;  
déanann siad faireach agus díoscán fiacal;  
“Tá sí slogtha siar againn,” deir siad,  
“is é seo an lá a rabhamar ag súil leis;  
tá sé buailte linn anois go soiléir.”



<sup>17</sup> Rinne an Tiarna a raibh beartaithe aige;  
an rabhadh a thug sé fadó riamh  
tá sé curtha i gcrích aige anois;  
tá sé tar éis tú a threascairt gan trua;  
rinne sé ábhar suilt do do naimhde díot  
agus chuir sé go mór lena gcumhacht.

<sup>18</sup> Éigh ó do chroí amach ar an Tiarna,  
a bhalla iníon Shíón;  
bí ag tál na ndeor ina dtuille  
de lá agus d'óiche;  
ná tabhair faoiseamh ar bith duit féin;  
nár thriomaí do shúile choíche.

<sup>19</sup> Éirigh! Glaoigh amach san oíche  
i dtús gach seala faireacháin!  
lig do racht bróin amach mar thuile  
i láthair an Tiarna!  
Ardaigh chuige do lámha  
ar son bheatha do leanáí óga,  
(atá ag titim i laige le hocras  
ag béal gach uile shráide).



- <sup>20</sup> Féach, a Thiarna, agus breathnaigh  
ar cé hí ar chaith tú léi mar seo;  
ní féidir gurbh éigean do mhná  
naíonáin dhea-chumtha a mbroinne féin a ithe;  
ní féidir gurbh éigean sagairt agus fáithe  
a mharú i sanctóir an Tiarna!
- <sup>21</sup> Tá óg agus aosta ina luí  
ar an talamh sna sráideanna;  
tá m'ógfhir agus mo mhaighdeana tar éis titim  
le faobhar an chlaímh;  
tusa a mharaigh iad ar lá do dhíbheirge;  
rinne tú sléacht orthu gan trua.
- <sup>22</sup> Chruinnigh tú uafás thart orm ó gach taobh,  
mar a chruinníonn daoine le chéile ar lá féile;  
níor fágadh fuíoll áir ná fear inste scéil  
ar lá dhíbheirge an Tiarna;  
an chlann a rug agus a thóg mé,  
dhíothaigh mo namhaid iad go léir.



## Dólás, Aithrí, Dóchas

- 3 Mise an fear a d'fhulaing cruatan  
faoi shúiste a dhíbheirge.
- 2 Ní sa solas ach sa dorchadas  
a thiomáin agus a sheol sé mé.
- 3 I m'aghaidhse amháin a ardaíonn sé a lámha  
ar feadh an lae go léir.
- 4 Tá mo chorp agus mo chraiceann tnáite aige  
bhris sé mo chnámha go léir.
- 5 Thóg sé balla i m'aghaidh  
agus thimpeallaigh mé le domlas agus duainéis.
- 6 Thug sé orm cónaí sa dorchadas  
ar nós na marbh a d'éag fadó.
- 7 Thóg sé múr i mo thimpeall chun nach n-éalóinn  
agus chuir sé le meáchan mo shlabhra.
- 8 Fiú amháin nuair a scread mé air ag lorg cabhrach,  
thug sé an chluas bhodhar do m'achainí.
- 9 Dhún sé na bealaí orm le clocha soghearrtha;  
chuir sé cor i mo bhóithre go léir.



- <sup>10</sup> Mar bhéar i luíochán nó mar leon in eadarnaí bhí sé in oirchill orm.
- <sup>11</sup> Chuir sé amú mé agus rinne sé ciorrú orm agus d'fhág sé treascartha tréigthe mé.
- <sup>12</sup> Theann sé a bhogha agus chuir sé i mo sheasamh mé mar sprioc dá shaighead.
- <sup>13</sup> Scaoil sé lán a bholgáin de shaigheada isteach i m'áranna.
- <sup>14</sup> Ceap magaidh ab ea mé ag an bpobal go léir, mé i m'ábhar aoire acu ar feadh an lae.
- <sup>15</sup> Líon sé mé le luibheanna searbha agus chuir sé masmas orm le mormónta.
- <sup>16</sup> Thug sé orm gairbhéal a mheilt faoi m'fhiacra, agus chlúdaigh sé mé le luathreach.
- <sup>17</sup> Is fada ó mo chroí a dhíbir tú an tsíocháin sa chaoi nach cuimhin liom céard is sonas ann.
- <sup>18</sup> Is é a deirim: “Tá mo bhuaire curtha ó chrích; tá deireadh leis an dóchas a mhúscail an Tiarna ionam.”
- <sup>19</sup> Cuimhnigh ar m'angar agus ar mo chuid fánaíochta, ar an mormónta agus ar an domlas.



- <sup>20</sup> Is cuimhin liomsa go sármhaith iad  
agus tá mo chroí spíonta istigh orm dá bharr.
- <sup>21</sup> Ach tabharfaidh mé an smaoineamh seo chun mo chuimhne,  
mar is é fáth mo dhóchais é:
- <sup>22</sup> Tuile gan trá is ea buanghrá an Tiarna  
agus ní théann tobar a thrócaire i ndísc.
- <sup>23</sup> Athnuaitear iad gach maidin;  
óir is daingean í a dhílseacht.
- <sup>24</sup> “Is é an Tiarna mo chuid den saol,” a deirim,  
“is ann mar sin a chuirim mo dhóchas.”
- <sup>25</sup> Is maith é an Tiarna don té a choimeádann súil in airde leis,  
don duine a bhíonn á lorg.
- <sup>26</sup> Is maith an ní é fanacht go foighneach  
le slánú an Tiarna.
- <sup>27</sup> Is é leas an duine an chuing a iompar  
le linn a óige.
- <sup>28</sup> Agus suí go tostach ar leithrigh,  
nuair a chuirtear air í,
- <sup>29</sup> agus luí síos béal faoi sa luaithreach  
– b’fhéidir go bhfuil ábhar dóchais ann fós –



- <sup>30</sup> agus a leiceann a iompú chun an té a bhuaileann é  
agus masla ar mhuin masla a fhulaingt.
- <sup>31</sup> Óir ní go síoraí seasta  
a shéanfaidh an Tiarna a phobal;
- <sup>32</sup> má chránn sé féin, is truachróioch é leis  
de réir iomadúlacht a bhuanghrá;
- <sup>33</sup> mar ní óna chroí a dhéanann sé  
an Ádhamhchlann a chiapadh agus a chrá.
- <sup>34</sup> Nuair a ghabhtar de chosa  
i gcimí uile na tíre,
- <sup>35</sup> nuair a sháraítear cearta an duine  
i láthair an Té is Airde;
- <sup>36</sup> nuair a thugtar cambhreith ar dhuine i gcúis dlí,  
an amhlaidh nach bhfeiceann an Tiarna é?
- <sup>37</sup> Cé a labhraíonn agus go ndéantar beart dá réir,  
mura gceadaíonn an Tiarna é?
- <sup>38</sup> Nach ó bhéal an Té is Airde  
a thagann an t-olc agus an mhaith?
- <sup>39</sup> Cén fáth a ndéanfadh duine ar bith gearán,  
go háirithe an fear atá ann fós d'ainneoin a pheacaí?



- <sup>40</sup> Scrúdaímis agus iniúchaimis ár mbéasa  
agus fillimis ar ais ar an Tiarna.
- <sup>41</sup> Tógaimis ár gcroíthe agus ár lámha araon  
chun Dé atá sna flathis go hard.
- <sup>42</sup> “Tá peacaí agus ceannairc déanta againne;  
níor thug tú féin maithiúnas dúinn.
- <sup>43</sup> Chuaigh tú sa tóir orainn agus feisteas feirge umat  
agus rinne tú sléacht orainn gan trua.
- <sup>44</sup> D’fholaiigh tú thú féin i néal  
ionas nach bpollfadh ár n-urnaí tríd.
- <sup>45</sup> Rinne tú dramhaíl agus bruscar dín  
i measc na náisiún.
- <sup>46</sup> D’oscail ár naimhde go léir  
a mbéal inár n-aghaidh.
- <sup>47</sup> Scanradh agus clais ghábhála is dán dúinn,  
léirscrios agus lot.
- <sup>48</sup> Tá linnte uisce le mo shúile  
de dheasca dhíothú mo phobail ionúine.
- <sup>49</sup> Sileann deora ó mo shúile gan stad,  
mar ní bhfaighidh mé faoiseamh ar bith



- <sup>50</sup> go mbreathnóidh an Tiarna anuas ó neamh  
chun feachaint orm.
- <sup>51</sup> Is crá croí dom a bhfeiceann mo shúile  
dá bhfuil á fhulaingt ag iníonacha uile mo chathrach.
- <sup>52</sup> An dream a bhí ina naimhde agam gan chúis,  
chuaigh siad sa tóir orm mar éan.
- <sup>53</sup> Chaith siad beo mé síos sa charcair  
agus dhún siad le cloch orm í.
- <sup>54</sup> D'éirigh an t-uisce os mo chionn  
agus dúirt mé: 'Tá deireadh liom!'
- <sup>55</sup> Ghlaoigh mé ar d'ainm, a Thiarna,  
ó íochtar na carcrach doimhne.
- <sup>56</sup> Chuala tú mo ghuí: 'Ná tabhair an chluas bhodhar  
do m'éamh agus mé ag iarraidh faoisimh.'
- <sup>57</sup> Dhruid tú i mo leith an lá a ghlaoigh mé ort  
agus dúirt: 'Ná bíodh eagla ort.'
- <sup>58</sup> D'agair tusa, a Thiarna, an chúis a raibh mo bhás ag brath uirthi  
agus d'fhuascail tú m'anam.
- <sup>59</sup> Chonaic tú, a Thiarna, an éagóir a rinneadh orm;  
seas ceart dom.



- <sup>60</sup> Chonaic tú conas mar a lig siad a nimh amach orm,  
a ndrochbheartaíocht uile i m'aghaidh.
- <sup>61</sup> Chuala tú, a Thiarna, faoina gcuid achasán,  
faoina ndrochiompar uile i mo choinne,
- <sup>62</sup> faoi cháineadh agus faoi chogarnaíl lucht m'ionsaithe  
ar feadh an lae go léir.
- <sup>63</sup> Bíodh siad ina suí nó ina seasamh,  
féach gur mise is ábhar aoire acu.
- <sup>64</sup> Bain sásamh astu, a Thiarna,  
de réir a ndrochbheart;
- <sup>65</sup> tabhair stuacacht chroí dóibh:  
bíodh do mhallacht orthu;
- <sup>66</sup> le teann feirge déan iad a thóraíocht agus a scrios  
de dhruim na talún, a Thiarna.”

## Duainéis agus Dóchas

### 4 Ochón!

Nach murtallach a d'éirigh an t-ór!  
Cad é mar a d'athraigh an mínór



agus mar atá clocha an tsanctóra scaipthe  
ag cúinne gach sráide!

- <sup>2</sup> Clann mhac oirirc Shíón,  
ar fiú a gcothrom féin den ór is fearr iad,  
mo léan, áirítear iad mar chrúscaí cré,  
mar dhéantúis lámh an photaire.
- <sup>3</sup> Fiú amháin na seacáil nochtann siad a n-ucht  
agus tugann siad an chíoch dá gcoileáin;  
ach tá mo phobal ionúin éirithe chomh cruachróioch  
le hostraisí an fhásaigh.
- <sup>4</sup> Greamaíonn teanga an naíonáin chíce  
dá charball leis an tart;  
iarrann na leanaí arán,  
ach ní thugtar dóibh é.
- <sup>5</sup> An dream nach n-itheadh ach bia beadaí,  
tá siad ag fáil bháis sna sráideanna;  
iad siúd a tógadh in éadach corcra,  
luíonn siad go faon ar charn dramhaíle.



- <sup>6</sup> Is mó pionósú mo phobail ionúin  
ná smachtú Shodom,  
a scriosadh ar an toirt  
gan aon duine a leagan lámh uirthi.
- <sup>7</sup> Ba ghile a flatha ná an sneachta;  
ba bháine iad ná bainne;  
ba dheirge corp iad ná an coiréal  
agus ba chosúil le saifír a gcló.
- <sup>8</sup> Ach anois is duibhe a ndéalramh ná súiche;  
ní aithnítear iad sna sráideanna;  
tá an craiceann craptha ar a gcnámha;  
tá sé chomh seargtha le giota adhmaid.
- <sup>9</sup> B'ámharaí iad siúd a maraíodh le claíomh  
ná iad siúd a fuair bás den ghorta,  
a bhíodh á snoí agus á n-ídiú go mall righin  
cheal torthaí na talún.
- <sup>10</sup> Fiú amháin na mná, arb í an taise is dual dóibh,  
bhruith siad a leanaí lena lámha féin;



is iad a bhíodh mar bhia acu,  
nuair a bhí mo phobal ionúin á scrios.

- <sup>11</sup> Lig an Tíarna a racht cuthaigh amach;  
tháinig lasair feirge fíochmhaire ann;  
d'adhain sé tine i Síón,  
a loisc a bunsraitheanna.
- <sup>12</sup> Níor chreid ríthe an domhain mhóir  
ná duine ar bith dá maireann ar an saol  
go rachadh namhaid nó eascara dá laghad  
isteach trí gheataí Iarúsailéim.
- <sup>13</sup> A mhilleán sin ar pheacaí a fáithe  
agus ar chionta a sagart,  
a dhoirt amach laistigh di  
fuil na bhfíréan.
- <sup>14</sup> D'imigh siad ar fán trí na sráideanna ina ndaill;  
bhí siad truailithe le fuil,  
sa chaoi nárbh fhéidir le haon duine  
baint lena mbaill éadaigh.



- <sup>15</sup> “Greadaigí libh, a neamhghlana!” a scairteadh leo,  
“Greadaigí libh, greadaigí libh, ná bainigí linn!”  
Theith siad leo chun fáin agus dúradh i measc na náisiún:  
“Ní féidir leo cónaí anseo níos mó.”
- <sup>16</sup> Chuir an Tiarna é féin scaipeadh orthu;  
níor chuimhnigh sé orthu níos mó;  
níor tugadh urraim do na sagairt  
ná ómós do na seanóirí.
- <sup>17</sup> Mheath ár súile orainn,  
ag feitheamh dúinn ar chabhair nár tugadh;  
bhíodh súil in airde againn ónár dtúir faire  
le náisiún nach bhféadfadh linn a shlánú dáiríre.
- <sup>18</sup> Coinníodh lenár sála  
sa chaoi nárbh fhéidir siúl trínár sráideanna;  
bhí ár ndeireadh buailte linn agus ár laethanta caite;  
níorbh fhada uainn ár dturnamh.
- <sup>19</sup> Bhí ár lucht géarleanúna níos mire  
ná iolair an aeir;



chuaigh siad sa tóir orainn thar na sléibhte  
agus rinne siad luíochán romhainn san fhásach.

<sup>20</sup> Ungthach an Tiarna, arbh ionann agus beatha dúinn é,  
gabhadh ina bpollghaiste é,  
an té a ndúramar faoi:  
“Is faoina scáthsan a mhairfimid i measc na náisiún.”

<sup>21</sup> Déan áthas agus gairdeas, a iníon Eadóm,  
tusa, a chónaíonn i dtír Úz;  
sínfeair an cupán chugatsa chomh maith;  
beidh tú ar meisce agus caithfidh tú díot anuas.

<sup>22</sup> Tá do phionósú curtha ar ceal, a iníon Shíón;  
ní dhíbreoidh sé thar tír amach thú choíche arís;  
ach smachtóidh sé thusa, a iníon Eadóm, de dheasca d’urchóide  
agus nochtfaidh sé do chuid peacaí.

## “Déan Trócaire Orainn”

**5** Cuimhnigh, a Thiarna, ar ar tharla dúinn;  
Breathnaigh agus féach ar na maslaí a thugtar dúinn.



- <sup>2</sup> Tá ár dtailte oidhreachta i seilbh strainséirí agus ár dtithe i seilbh allúrach.
- <sup>3</sup> Dílleachtaí is ea sinn de cheal athar; baintreacha is ea ár máithreacha.
- <sup>4</sup> An t-uisce a ólaimid, caithfimid é a cheannach; bíonn orainn íoc as ár n-adhmad féin.
- <sup>5</sup> Tá [cuing] ar ár muineál agus tiomáintear go róghéar sinn; nuair a bhímid traochta, ní thugtar sos dúinn.
- <sup>6</sup> Ghéilleamar, seal do na hÉigiptigh, seal do na hAsáirigh, chun ár ndóthain bia a fháil.
- <sup>7</sup> Pheacaigh ár n-aithreacha; ach níl siadsan ann níos mó; is orainne a agraítear a gcionta.
- <sup>8</sup> Tá sclábhaithe dár rialú; agus níl duine ann chun sinn a fhuascailt uathu.
- <sup>9</sup> Is i mbaol ár n-anama a fhaighimid soláthar bia mar gheall ar shladaithe an fhásaigh.



- <sup>10</sup> Tá beirfean inár gceisceann faoi mar a bheimis i sorn toisc cuthach ocrais a bheith dár gciapadh.
- <sup>11</sup> Rinneadh éigniú ar an mbantracht i Síón agus ar na maighdeana i gcathracha Iúdá.
- <sup>12</sup> Crochadh ár bhflatha;  
ní thugtar ómós do sheandaoine.
- <sup>13</sup> Bíonn na hógfhir ag oibriú na bró agus na garsúin ag tuisliú faoi ualaí adhmaid.
- <sup>14</sup> Ní bhíonn siúl na seanóirí ar an ngeata níos mó agus tá an t-aos óg tar éis éirí as an gceol.
- <sup>15</sup> Tá deireadh leis an áthas a bhíodh inár gcroí agus rinneadh caoineadh dár gcuid rinnceoireachta.
- <sup>16</sup> Tá an choróin tar éis titim dár gceann;  
is mairg dúinn de bhrí gur pheacaíomar.
- <sup>17</sup> Is é fáth a bhfuil ár gcroíthe go dona tinn agus ár súile go dúdhorcha dall:



- <sup>18</sup> toisc go bhfuil Sliabh Shíón treascartha tréigthe agus go mbíonn seacáil ag smúrthacht thart ann.
- <sup>19</sup> Ach maireann tusa, a Thiarna, i do rí go brách; beidh do ríchathaoir ann ó ghlúin go glúin.
- <sup>20</sup> Cén fáth a ligfeá sinne i ndearmad go deo agus a dtréigfeá sinn go síoraí suthain?
- <sup>21</sup> Cas ar ais chugat féin sinn, a Thiarna, agus fillfimid ort; athbhunaigh an réim a bhíodh againn anallód.
- <sup>22</sup> Óir tá tú tar éis sinn a shéanadh amach agus amach, is an-mhór ar fad an fhearg a ghlac tú linn.

